

中國通圖集成

中國通圖集成

中國邊疆史志集成

內蒙古史志
28

全國圖書館文獻
縮微復制中心

古
豐
識
畧

秋雨長門珠簾晝卷銀燭宵昏淚零宮草夢斷紅蓀
不妃赤帝願嫁烏孫漢室和親匈奴請后狗監催粧
姪娥折柳擁髻升車光射左右天子拊髀呼韓稽首
生辭金屋遠適玉關蕭條紫塞迢遞青山笳吹忽起
馬鳴不前驚沙匝地哀雁橫天鴨綠江邊漫羅山下
貂帽狐裘角弓玉弣錦繖夫人胡服騎射亂點酴醾
輕飄蘭麝月高圍屋雪滿拂廬琵琶細語垂手鐸綸
闕氏一笑醉倒單于左賢色動比妓踟躕朔漠霜寒
帝京雲杳凜凜北風依依南鳥碧顏方驕紅顏易老
旃車晚出毳帷夜燭悲來別鶴慙去聚塵甯甘仰藥

豈忍抱襦竟埋沙磧敢望玉鉤魂分歸來歸彼歸州
神遊故鄉形銷絕域墓草青青三年化碧漢使傷心
胡兒嘆息恩怨千秋聲傳玉笛

鄭祖僑費公生祠碑記

鄭祖僑字惠菴右玉人父崇雅為武陵丞

卒於官僑走數千里負骸骨歸家貧苦學中式康熙壬午科舉人官曲沃教諭

曩者噶爾丹遠阻聲教頻年跳梁侵擾各蒙古部落
以致九邊析起灞上烽然祈連以北俱為鋒鏑之場
矣

天子赫然震怒推轂委大將軍駐劄歸化城凡有外
滿漢官及蒙古部落咸屬調遣時甲戌季春也自大

將軍出鎮邊外雞犬不驚貿易交錯兵無匱餉之患
民鮮輸輓之苦且秉雄謀具遠畧威儀外嚴風神內
照謙光下物赤心示人無論官兵軍卒咸被仁風而
遵紀律焉不料渠魁負固屢犯

天朝雖逞螳臂之威恐為尾大之釁

皇上親統六師深入不毛勅命大將軍會合諸路協
力剿除三十五年五月十三日登壇誓眾指揮三軍
於昭磨多地方矢石並集白刃交前殲數年之狡寇
解生民之怨讟積甲如山尸封塞河大將軍復深入
巢穴收合餘燼俾遺孽途窮銜壁軍前皆畏威仰德

共待

皇恩向之窺伺中夏憑陵同盟者莫不一朝底定也
奏捷後

御駕凱旋復以大將軍精忠性成壯武夙具其密謀
碩畫素匡贊於

宸聰者不可枚舉但鶻奔鼠竄之黨匿形山谷遺患
將來

特命留鎮邊庭以防復作封為撫遠大將軍凡滿漢
諸軍既蒙用命之賞復被投醪之惠而將軍則揚旌
瀚海繫馬陰山嚴刁斗而守烽燧朝夕無暇逸焉方

將軍之用兵也三令五申不拘孫吳舊書暗合衛霍
方略是以拓境邊外懾服遐方且器量深沉知人善
任山藪無棄苞苴不行兵不敢欺盜不敢發於歸化
城駐節數載商賈駢集泉貨流通荒萊既墾黔黎茂
育兵革之餘倏成繁華之地雖古之紀功狼居胥勒
石燕然山者未若斯之盛也三十六年八月十一日
晉為內大臣一等公三十七年二月初一日
皇上眷念封疆大臣久駐塞外特命迎歸勛第朝夕
啟沃凡塞外兵民商賈共深河內之請同念黎陽之
別將軍以

皇命諄諄不遑久滯與故老營弁多方勸諭撫恤相別凡經過之處無論老幼莫不攀轅迎頌歡聲四起頌將軍之德皆戴

天子之恩於無疆也至於今塞外屢閉撲地歌吹動天皆將軍之遺惠所垂雖

朝廷屢頒寵眷之典而草野詎忘涓埃之報於是營方面吉地選山澤良材命虞衡之匠引堊黝之司建造祠堂以紀宏勛而慰民望祠成凡軍民商旅仰瞻其下者無異昔年帷幄鼓吹時也首事人等欲勒諸貞珉問序於余余僅以管窺之見述其大概云爾至

大將軍平生事業翊贊忠蓋俟諸麟閣之紀焉

袁枚撫遠大將軍費襄壯公傳袁枚字子才號蘅齋浙江

錢塘人弱冠試宏博乾隆戊午己未鄉會聯捷改庶常出宰江南三十六歲移病歸奉母

居隨園年八十一以壽終所著有小山房詩文集

費公揚古滿洲正白旗人居董鄂地方以地為氏年十四襲三等伯爵性樸直而貌雄奇待人以和無疾言遽色好在

上前自言己短人多笑之康熙十九年以御前侍衛為火器局總管兼議政大臣二十九年厄魯特噶爾丹不靖

聖祖命隨裕親王征之破賊於烏闌地方先是厄魯特部落與喀爾喀連界厄魯特之子縱獵喀爾喀地方爭獸被殺厄魯特酋長噶爾丹謀報讐陰令番僧千人詭遊牧在其界內一年而喀爾喀不知也突於除夕率眾鼓譟直入所伏千僧從中接引喀爾喀度歲犇飲醉卧矣變起倉猝父子不相顧向南狂犇噶爾丹追逐所殺士卒無算喀爾喀奔至中國款關求救面目如鬼自言飢餓垂死乞

大皇帝活命

聖祖憐而納之仍與位號賜牛馬撥有水草處俾居

遣人諭噶爾丹曰汝兩小國唇齒相依當各守甌脫何必互相吞噬朕仰體天地好生之心不喜人爭鬥汝可休兵回國毋違朕命噶爾丹奏云喀爾喀殺我子我理當報讐

大皇帝要我罷兵可將我讐人車臣汗哲卜尊二人交出我便回去

聖祖詔答云人窮促來歸朕心哀之豈肯以讐人畀汝汝他日窮促來歸朕亦如待車臣者待汝不歧視也噶爾丹恃強不服

聖祖怒下詔親征分三路出塞命公出西路

御駕出中路將軍馬思哈出東路先遣諜者誘其來
噶爾丹疑

聖祖必不親臨果以兵至到克爾倫地方離中里營
四十里其前哨探知

御駕所在精兵悍將萃焉西路費將軍兵已糧盡噶
爾丹遂避中路而直犯西軍公下令曰我兵深入不
毛噶爾丹探知糧盡故直來犯我我當先示弱以驕
之而一鼓作氣以擒之我軍今日視我鳴角然後發
矢礮我角不鳴先發矢礮者斬令畢噶爾丹兵數千
至矣各列隊兩山岡公先遣疲卒四百人挑戰噶爾

丹張兩翼圍之四百人盡歿於陣噶爾丹大喜直薄
我師矢石如雨公端坐胡牀手執大角而不吹將軍
孫思克跪請曰事急矣賊騎相離二十步我軍張弓
引矢張目待將軍若再不戰事恐不支公怒叱之退
又稍稍近前公鳴角左右俱鳴角矢礮齊發瞬息間
烟塵蔽天賊眾披靡馬散走山凹公仰天大笑指揮
眾兵取虜糧物而窮追之其眾大潰酋長頭目或死
或降噶爾丹僅以身免奏上

聖祖諭云九月十三日卿奏已到朕甚欣慰現丹濟
勒雖降噶爾丹降表未至然知其破壞已極不能支

拒倘其來降卿可善言諭導令至歸化城候旨當籌
一地方安置之亦是古聖人柔遠之義

王師凱旋公以軍功進爵一等仍管撫遠大將軍事
公退而告人曰我兵枵腹不能耐久故鼓其銳氣忘
命一戰竟能勝之如彼持重不鬥環圍一日則我敗
矣或有頌其功者謝曰我有罪無功我恃勇深入至
於絕糧一罪也約會後期致勞

聖慮二罪也倘不仗

聖主如天之福虜不知兵我死有餘辜尚敢言功乎
其謙退如此公在軍中與士卒同甘苦坐帳下事無

大小皆親決之有求見者不待傳宣登時召入好讀
左氏春秋手不釋卷一日立營未久民捉一兵至訴
其闖入渠家調其婦公問成姦乎曰未也公拔一刀
與之曰今立營之初斬之不祥嗣後此兵敢再來汝
家即將此刀斬之民與兵皆叩頭去後作先鋒衝虜
陣者即此兵也朔漠既平

聖祖詣箭亭觀射諸大臣皆彎弓發矢公奏臣臂痛
不可以弓

上許之出而告人曰我曾為大將軍倘一矢不中有
損國家威重毋乃為外夷所笑故不與諸將軍角伎